

Jouleto davalè de la carriolo, couifado d'uno capelino roujo, mi fichu dount lou founs blanc èro flouri de viôuleto se crousavo sus soun boumbet gracios. Emé sa raubo à raio blanco, à raio bluio, à raio roujo, que ié davalavo just à l'enaut de si caviho ; emé si debas viôulet e sis escloupet de sause courreja de nòu, Jouleto, ravoio e touto alegourido, sourtiguè sa pichouno gourbello de la carriolo, l'anè porge à l'oumbro dis óume ramu, pièi, embé sa taio de guespo e soun gàubi divin, d'un air poulidamen fougnaire, en s'aprouchant de iéu :

« Moussu Brisquimi, me digue, voudrias-ti de iéu pèr ajudo ? »

Erian soulet, soulet au mie de tout aquéu terraire, qu'à noste entour cascaiejava de jouinesso e d'esperanço.

Nòsti regard se rescountrèron e, sènso rèn dire, tóuti dous à la pensado, emé li mèmi desiranço, abandounerian fourco e rastèu.

Oh! Rampèu de bais, femimen de labro, regard d'amo!

Is ardent trampelamen de nósti cor, desoublidavian l'ouro. Jouleto, dins rèn de tèms me desmudè tóuti li joio qu'avié esprovado, quand Louviset, en parlant di cregne qu'avié pèr lou tèms, i'avié di d'alesti nosto biasso, dins la gourbello qu'èro eilai à l'oumbro. Emé touto la benedicioun de sa caro, apielado sus soun rastèu, Jouleto me countavo pèr lou menut tóuti li groumandige que nous avié mes d'escondoun dins la canastello. Coume anavian bèn dejuna tóuti dous...

Tóuti aquéli pichot groumandige que devien faire noste dejuna, Jouleto li pausavo fadamen sus lou germe fresqueirous, e iéu, esbalauvi de tant de gràci e d'innoucènci, l'amirave, la belave, la badave, silenciousamen.

Es-que mangerian ? Es-que beguerian ? N'en sabe rèn, me n'en souvène plus. Lou vent boufavo, lis aucèu s'apasiavon de canta, en s'aclatant dins li fùiage, li parpaioun plegavon lis alo dins lou calice di flour ; e nàutri, nous miraiavian, elo dins mis iue, iéu dins li siéune. S'ausié plus rèn que li ronflado de l'auro, que fasavo, en fasènt courre à noste entour, de brusidis que s'esperlougavon dins de gème escretramen amoureux.

La sarrère contro iéu ; si peu arrage, sus soun cou, sus sis espalo, i revoulunado de l'auro, capriciousamen voulastrejavon ; courrissien sus moun front, sus mi gauto. Sa man quichavo la iméuno, nous disian rèn, tremoulavian, femissian, nous manjavian dis iue, di labro, nous agachavian coume li benurous dèvon s'agacha, soun fichu s'èro desfa, soun jougne badavo, èro à mie despeitrinado : vesiéu la blancour de soun cou, lou cande de la nuco arredounido, si dos poulidi cougourleto.

O bèuta de Dieu! Trésor di vierge!

Davans tout aquel abounde de rosé e de blanc, embé de prusimen deleitous, dins mi bras l'aubourère... quand me semblé que de pas venien de se faire entendre.

« Lou baile Louviset ! Jouleto, adoubo toun jougne e ti peu, ti peu e ta raubo ! »

Désespéra, dins un dagaramen imparaulable, quiterian noste abri pèr ana reprene noste travai, sènso rèn dire, coume se nous voulian de mau.